

欽定平定教匪紀略

欽定平定教匪紀畧卷二十四

十二月初七日

庚子

上諭內閣曰御史斌松奏八旗屯居人等一併編查保甲一摺八旗屯居漢軍前經降旨交地方官一體編入保甲稽查約束其屯居滿洲及下五旗王公包衣人等之屯居者如何稽查約束亦經飭交該都統及宗人府查明議奏至八旗滿洲蒙古漢

軍閑散人等有依住墳塋房屋者既在各該縣境內居住本旗叅領佐領等難以隨時查察著卽交該地方官一體編入保甲

上又諭內閣曰御史童槐奏請將逆匪案內應拏要犯開寫清單交步軍統領等衙門及各省指名查拏其迹涉疑似者毋得草率送部以僞亂真等語所奏甚是近日各處具奏盤獲形迹可疑之犯據

供京師附近及外省地方皆有伏匿夥黨指証甚確及交步軍統領等衙門暨各督撫按名拏獲審訊情節半屬子虛且有挾嫌誣捏者與正案全無干涉而正案內在逃要犯節經降旨嚴飭查拏步軍統領順天府五城等衙門緝獲者甚屬寥寥專待指名方能拏解如此孰不能爲耶外省拏解亦多詐僞是內外各衙門皆役志於虛無疑似之地

而轉令正犯日久稽誅又涉因循疲玩辦理頗爲
失當此案未獲兇渠內有首助逆謀者皆罪大惡
極若不迅就捕誅則遺孽尙存必致又萌逆志著
交軍機處將現在京外未獲各犯內查明最要次
要開寫姓名籍貫清單交步軍統領順天府五城
及應緝省分之將軍督撫等分飭所屬上緊躡緝
并廣出示諭責令首報以期必獲如捕獲最要人

犯官弁立加超擢兵丁重賞超拔民人優加賞賚
其捕獲次要之犯亦分別獎賞但必須質訊明確
實係正犯無疑方錄其功將此通諭知之

十二月初八日

辛丑

那彥成高杞楊遇春奏言竊

臣等剿滅司寨賊匪後卽將官兵撤回滑縣併
力攻城連日以來各門礮臺每有擊斃賊匪及
轟落城磚者緣城郭甚堅僅墜外層磚皮急切

不能摧破臣等並派吉林官兵伏於礮臺之後
及濠溝內一見賊匪在城露面卽行放鎗無不
應手立倒賊匪不敢露面僅藏於礮眼內放鎗
亦多被吉林官兵鎗斃十餘日來每日所殲約
計三五十人不等又於各門派撥兵夫暗挖地
道中置地雷火藥以備轟城其東門一處係派
格布舍及遊擊萬彪督辦又城之西南角一處

係派楊芳桑吉斯塔爾督辦楊芳拏營之處逼近西南城角不過數丈復又堆積沙土布袋初二日正令官兵攀躋而登詎賊匪情急鎗礮亂發復拋下斷碑巨石等項致將地道打塌現仍從旁道紆迴挖掘一路明挖一路暗進使賊匪未經知覺不及窺測又東門地道一處已經挖進外城賊匪因恐官兵爬城於夜間擲炬瞭望

草把適墮空穴之中地雷猝發內外俱焚燒斃
城內賊匪無數官兵正在地道之中亦被焚燒
千總任起鳳把總朱祥李登高及兵丁人夫等
十餘名均經燒斃彼時方安火藥於穴內未能
堵口是以其力不大僅轟破外皮城牆二三丈
臣等親督官兵仰攻直上詎賊匪復趕緊將城
牆裂處創斷未能得手至初三日三更月黑之

時復有賊數百人潛出北門時遊擊呂天俸所
管礮臺在西北角距城最近該匪拋擲火彈欲
焚礮臺臣等傳令各營不許燃火分投督率各
門官兵嚴行堵截馬元特依順保防守北門先
行帶兵截住正在相持呂天俸卽於礮臺開礮
擲石轟擊賊匪直前抗拒叅將扎勒杭阿都司
彭啟賢相近呂天俸礮臺亦卽帶兵接應衝殺

斃賊約數十人賊向城東奔竄德寧阿復率吉
林黑龍江官兵鎗箭齊施又斃賊匪無數衆兵
併力競進賊始倉皇竄回北門官兵因在黑夜
不便追趕入城次早查勘自北門營卡以至城
根血迹遍地尙有傷重倒地賊匪十三名隨卽
正法官兵亦因黑夜殺賊間有傷亡統容查明
咨部外現在東西各門官兵紮營均已切近城

根惟南門北門以外皆係葦蕩泥潭之地不能
近城僅於葦蕩之中間擇其地土稍燥者紮營
堵截又北門外地勢寬濶一望無垠是以賊匪
屢出此門希圖滋擾而不敢逕撲營盤者亦因
地土泥潭難以駐足之故經此次各營官兵併
力截殺之後諒不敢再出滋擾臣等察看大局
情形現在城中賊匪明知逆首已殲外援已絕

大兵四面圍攻別無生路是以負嵎抗拒其守
益堅查賊匪佔據道口之時已先將該處糧食
運貯城內其口食自尙有餘惟賊匪馬草乏絕
卽便出城逃竄馬匹已疲諒步行奔走者多以
官兵馬隊及吉林黑龍江馬隊追擊斷無免脫
況臣等於各門外先已挖掘濠溝二道遍排鹿
角二層逐段分派官兵節節防堵於附近各村

莊先伏羲勇諭以破賊之日如有零匪逃出立
卽細縛獻出加以重賞能得賊首者保奏官職
村民志切同仇俱皆踴躍聽命此時事在垂成
臣等益當慎之又慎不敢少有草率奏入

上批示

硃諭曰頓兵堅城之下已月餘矣况新年已近外藩
俱集必得旬日之內殲除淨盡不可再遲所有指

名嚴緝各逆犯不可令其漏網汝三人合力同心
奮勉迅速辦理朕惟計日以待捷音實深焦急汝
三人不可稍有耽延慎重妥速爲要

那彥成又奏言再司寨拏獲賊犯秦理所供教
匪傳教及起事情節較爲詳細臣前已繕供單
密呈

御覽因思秦理熟悉賊中情形或李得水所供之趙

得隴等犯蹤跡亦所知悉現復訊據供稱趙得隴卽趙幅趙得鳳卽趙祿實是直隸長垣縣人並非河南太康縣人手下有張大小子張二小子於九月初十前帶人來投李文成入夥曾說在長垣鄉莊戕害知縣之事後來趙得隴在滑縣北門外打仗被官兵殺死趙得鳳張大小子張二小子三人同李文成逃到輝縣司寨趙得

鳳在寨內燒死張大小子張二小子都在寨外
殺死却不知徐茂恭又是何人等供此時司寨
賊屍枕藉相距十餘日之久實難再行辨認所
供是否可信容當留心訪查其馮克善一犯臣
已遣派幹員前往晉省偵探倘有蠢動情形臣
高杞卽當帶兵星馳剿辦奏入報

聞

十二月初九日甞章煦奏言竊馮克善一犯經
臣連次派委文武幹員分投躡緝先據獲解引
送馮克善至馮哲家住宿之劉添祥暨馮哲二
犯到省臣飭令陞任保定府知府張五緯揀發
知府楊毓江知縣陳晉訊據供出馮克善欲往
獻縣一帶地方又經飛飭跟拏去後茲據獻縣
知縣張翔稟稱遵卽在縣境四處訪查初四日

訪得冉家三角村有一人在彼賣藥形跡可疑
當卽密囑把總高雲鶴典史吳楷各帶兵役馳
往堵住村口該縣親率丁役前往拏獲訊據供
稱劉明德情詞閃爍似係河南滑縣口音查對
年貌服色並隨帶衣被等項均與奉

旨飭拏之逆犯馮克善相符並搜出劉姓祖遺

誥軸詭托姓名狡賴由該縣親身押帶來省聽候審

究等情臣隨卽派委員弁迎提到省臣率同司
道府親加嚴鞫該犯始猶狡混迨提劉添祥馮
哲當堂質認實係馮克善正身始據該犯供認
伊實名馮克善住居河南滑縣城內有胞弟馮
克文堂兄武舉馮克功俱係分居七八年前林
清與李明九支進才前赴滑縣與李文成牛洛
明于克敬并該犯認識交好本年二月伊赴林

清家住宿兩日回家八月初間李明九支進才
赴牛洛明家約令起事伊曾赴德州找尋朱躍
澧回至道口聽聞滑縣已將李文成等拏去并
指名拏伊該犯害怕逃去後聞劉成章等帶領
山東人進城戕官救出李文成等伊仍回滑縣
李文成派令運糧後因官兵攻打道口伊又逃
出於十一月初九日復至朱躍澧家由劉添祥

引至馮哲家住歇一宿卽查開劉添祥家三代名字改名劉明德並取劉家

誥軸護身逃至獻縣地方被獲等語並將教內緊要頭目逐明供出伏思馮克善係奉

旨飭拏緊要逆犯一經拏獲卽應遵

旨解京未便久留推鞠臣現將該犯嚴加鎖鑰裝盛

木籠派委文武幹員多撥兵役卽日起解飭令

兼程行走赴刑部投收其劉添祥馮哲亦一併解部質審

同日方受疇奏言查豫省軍需前奉部咨本省進剿官兵祇照例支給口糧其防守兵丁口糧之外不得支給鹽菜並不得每名每日折給銀一錢五分等因奉

旨依議欽此自應遵照辦理惟查滑縣賊匪滋事派

調本省滿漢官兵會剿與奉

旨簡派京外各省官兵同一衝鋒冒鎗實無區別若
因其未出本省交界僅與口糧不支鹽菜未免
向隅至防守官兵均在近賊處所晝夜提防其
勞苦與征兵無異合無仰懇

皇上格外

天恩俯准一體支給鹽菜口糧以示體卹本年豫省

收成歉薄糧價倍昂並請照晉省奏准之案每名每日折給銀一錢俾各兵得以通融買食咸資果腹再查官兵馬匹應需草料價值例價五分不敷應請每匹給銀一錢俾資餵養均奏入

上諭內閣曰章煦奏拏獲首逆馮克善一摺覽奏欣慰馮克善一犯與林清李文成均係賊中首惡勾結多年滑縣長垣東明定陶曹縣等處賊匪皆聽

其指使從前訊據賊供林清詭稱天皇馮克善詭稱地皇李文成詭稱人皇其大逆不道殊堪髮指林清李文成先後伏法惟馮克善在逃未獲茲據章煦奏前拏獲指引馮克善逃遁之劉添祥並存留之馮哲二犯派委前任保定府張五緯等訊明蹤跡嚴密飭拏經獻縣知縣張翔帶同把總高雲鶴典史吳楷於縣境之冉家三角村將該犯拏獲

該署督親提鞠訊業經供認確實派員解京審辦
該逆罪惡貫盈難追

天誅令渠魁全獲所餘黨惡延喘滑城克復捷音旦晚
卽至仰承

昊佑欽感靡涯章煦督緝要犯任事實心著加恩賞加
太子少保銜仍交部照軍功例從優議敘現屆年
節並親書福字頒給俾迓吉祥獻縣知縣張翔著

加恩超陞知府把總高雲鶴著加恩超陞守備典
史吳楷著加恩超陞知縣均著先換頂戴承審之
通永道張五緯知府楊毓江知縣陳晉均著交部
議敘獲犯兵壯丁役等著該署督從重獎賞

臣等謹按天地之大並育並生雖梟獍之徒
不能遽絕于清寧之世然未有如天理教之
猖狂無忌者也夫草竊之徒千名犯義或僞

署官職或假稱侯王皆罪不容誅尙爲事所
經見至于三皇之稱從來無敢僭竊者乃此
次賊黨搆亂林清竟詭稱天皇馮克善詭稱
地皇李文成詭稱人皇蹟神聖之隆稱竊先
天之位號互相推奉假幽渺恍惚之談助其
邪慝悖亂之行以此脅衆衆且被其刼持以
此愚民民皆受其迷惑實史冊所未有爲覆

載所不容是時

天討赫申滑城垂克顧三逆一日不滅則人心一日
不安三逆一人未除則亂萌一日不戢林清
李文成先後伏法馮克善尙輾轉潛逃乃司
寨盪寇之餘旋得獻縣獲犯之信旬日之內
載報擒渠

吉祐自

天洵爲蔽功先兆矣

上命軍機大臣傳諭托津那彥成高杞楊遇春日官兵自前月初三日圍攻滑城將及四旬尙未攻克現在年節已近蒙古外藩等均陸續到京朕已面諭伊等以那彥成等圍困滑城指日克復軍務卽可告蒞伊等同深欣盼豈可再有遲延且近日京外謠言甚多詭稱伏匿之賊糾約訂期起事其言

固不可信而究其所以造爲此言者皆緣滑城久未攻克逆黨一日稽誅則人心一日不定如將滑城賊匪刻期掃除淨盡則伏莽全消訛言不禁而自息本日據章煦奏到首逆馮克善一犯已於本月初四日在獻縣拏獲因章煦辦事認真已降旨賞給宮銜仍加恩從優議敘并將獲犯官弁加等獎擢那彥成等身膺重寄寧尙欲效從前陋習於

軍營度歲宴樂不思早奏成功仰慰朕懷乎該督
等接奉此旨務卽鼓勵將士上緊逼攻至遲亦不
得過本月二十日俟捷報到時佇膺懋賞至直隸
邊界地方現有馬瑜富蘭閆俊烈徐錕劉榮慶五
人在彼分營駐劄足資防堵京城年節事繁辦事
需人托津卽奉此旨著輕騎減從卽日前赴滑縣
軍營與那彥成等會商善後事宜無論城克與否

但探明他處無煽亂之事卽起程回京其健銳火
器營官兵那彥成等俟攻克滑城後仍交原派管
帶之慶祥等帶領先行凱撤回京可也再據劉鏐
之奏前此滑縣被陷時聞有教官呂秉鈞降賊僞
封爲吏部尙書仍兼知滑縣事在彼爲賊鑄礮巡
城抗拒王師如果屬實該逆以現任職官從賊助
逆實堪髮指著那彥成查明覆奏克城之日留心

查拏按律究辦又本日據馮克善供出有伊胞弟
馮克文及牛洛明陰成德三犯均係滑縣人又前
據李得水供出之馬依潮邢分二人亦稱籍隸滑
縣前此那彥成所奏賊目名單內均未列入並著
一體查緝務獲勿任漏網

上諭內閣曰方受疇奏豫省調派本處征防官兵請
一體支給鹽菜口糧並應折馬乾請照例價加增

等語本省調撥官兵例不准給鹽菜銀兩前據該撫奏請支給經該部照例議駁今據奏豫省連歲歉收物價昂貴例支銀兩不敷食用自係實在情形著加恩將豫省調派征防官兵自此次奉旨之日爲始准其一體支給鹽菜口糧每名每日折給銀一錢俾資果腹其應折馬乾銀兩並准其每匹日給銀一錢此係特旨准行嗣後不得援以爲例

同日方受疇奏言竊查豫省軍需災賑費用浩

繁前蒙

賞撥睢工銀一百三十五萬兩因停工不辦

奏准改撥軍需災賑之用此項餉銀未到以前因

軍需緊急先由司庫借墊俸餉等銀四十餘萬

兩亟須撥還歸款其餘銀兩除各項軍需及災

區撫卹動撥供支外現僅存銀二十六萬餘兩

此時八省官兵俱在豫省堵剿且有善後留防
並撫卹難民及災區展賑之用計算不敷仰懇
皇上天恩勅部酌撥銀一百二十萬兩解豫備用再
查河南糧鹽道庫現在堪撥銀十萬兩奏入得
旨戶部速議具奏旋經戶部議奏請於兩淮鹽課等
款如數撥給奏入

上從之

十二月初十日

癸卯

董誥等奏續經審明各衙門

獲送從逆夥犯並邪教爲從及應行緣坐各家

屬除劉泳太于七劉興庭三犯尙有質訊之處

應與前經奏明待質之田馬兒董峒太劉輩兒

李玉隴祝林韓達子張二住王四卽王廷瑞八

犯均請暫留待質外請將從逆夥犯田二卽田

起祿劉明信曹五卽曹鳳文顧中德卽顧宗德

楊保邢七卽邢綢榮張延太李亮顧明如卽五
兒張二卽張隴葉老卽狗生兒閭五李成宗卽
李驢子李大脖卽李振邦趙羣曹六王添瑞王
有太卽王輔劉連美劉二卽二小子二十犯均
依律凌遲處死其在監病故之白大和一犯請
剉屍一併梟示其邪教爲從之王七卽王璧齊
八卽齊泳保韓自會韓自有卽韓喜兒韓自富

韓自義韓自文韓玉慶卽韓十兒韓玉良韓玉
柱韓玉寶韓玉豐韓自力卽鍋塌子韓自信李
四王幘士均發往新疆給額魯特爲奴其應行
緣坐之劉成祿閆陳氏等十名口均分別發遣
爲奴得

旨田二卽田起祿劉明信曹五卽曹鳳文顧中德卽
顧宗德楊保邢七卽邢幘榮張廷太李亮顧明如

卽五兒張二卽張隴葉老卽狗生兒閻五李成宗
卽李驢子李大脖卽李振邦趙羣俱著卽凌遲處
死曹六王添瑞王有太卽王輔劉連美四犯係預
知逆情在家未行俱著改爲斬決一併梟首示衆
劉二卽二小子係自行買備白布在家未行著改
爲絞決嗣後審訊案犯情節與此相似者該部卽
分別定擬斬決絞決具奏白大和在監病故著判

屍梟示閭陳氏著暫留備質餘依議

十二月十一日師董誥等奏言昨據直隸委員

將逆犯馮克善解到臣等連夜熬訊據供我是

河南滑縣人年三十七歲父母俱故親弟馮克

文娶妻劉氏子坤牛現止三歲嘉慶二年有山

東濟寧州人王祥卽王四教我拳棒又有滑縣

朱召村人唐鬍子卽唐恒樂教我鎗法十五年

二月我連襟滑縣書辦牛亮臣見我拳法內有
八方步他說你脚步是個八卦麼我說你何以
知道是八卦他說我習的是坎卦所以懂得我
就謊他說我習的是離卦他說你既是離卦我
們是坎離交宮各人行各人的好罷後來我就
算了離卦他就做了坎卦頭十七年四月有我
同縣的霍雲方舉薦我到德州去與宋躍濠比

拳宋躍澐比不過我同他兒子宋玉林都拜我
爲師入離卦教後來我又收牛亮臣之子牛文
成濬縣的李大成卽李成進滑縣的熊自華張
九成爲徒他們又各自傳徒人數越多就推我
爲離卦頭目本年正月牛亮臣約我往宋家莊
林清家中商量起事我於二月內動身到德州
宋躍澐家就同宋玉林起身到宋家莊見了林

清林清對我說明號是奉天開道其暗號並起
事日子俟八月內到河南與牛亮臣再商量我
住了兩天同宋玉林回至德州隨到滑縣見牛
亮臣告知林清的話八月初間林清先到道口
叫牛亮臣約會衆頭目到彼相見我就前往道
口林清說他是文聖人李文成該做人皇我是
武聖人明號是奉天開道暗號是得勝二字約

定九月十五日動手造反各帶徒弟於本縣起
事限定半月到京會齊那時牛亮臣對我說李
文成馮學禮于克敬劉成章都已來過還有八
個大頭目劉綱明劉宗順王道瀝王修智壽光
德宋克俊陰成德馮相林也都來商量過了又
有六十四個小頭目內中惟徐安綱崔士俊王
上香胡成德王聚霍雲璧記得姓名其餘記不

清了李文成都給他們送信約定起事及到京
日期那時林清又說我要占直隸保定府一帶
你們各自占地方去若是不占我就都占了李
文成就說他占河南彰德府一帶我說占山東
德州一帶後來我因宋躍濫手下人少不能占
據只好在滑縣幫同李文成起事不料八月十
三日我堂兄馮克功同我兄弟馮克昌到縣中

將我同牛亮臣李文成一齊出首我隨於十五日逃往德州宋躍濬家至九月初九日趕回滑縣行至北門見城門尙未開閉有從前賣藥的吳自新賣膠泥的王禮等看守城門未經攔阻我尋到家中見我女人同兒子女兒都已砍死在地彼時于克敬劉成章因我没有在家救李文成告知牛亮臣前來拏我我苦苦哀告牛亮

臣方纔饒我叫我好好替李文成辦事就派我在富新莊運糧往謝家莊給李文成食用我每逢運糧到謝家莊都交給馮祥麟的兒子送給李文成們食用李文成因夾傷兩腿不能見面後來官兵已到我心中害怕又因李文成把我妻子兒女都殺死心中忿恨想逃往德州找朱躍濬約人起事兼殺李文成報讐十月二十三

日起身繞道行走於十一月初間到德州向朱
躍瀝商量他說我手下人少不能起事我說你
旣不能幫我只好往山西解梁找我師傅唐鬍
子起事你替我多湊幾兩盤費罷他信了我的
話給我十六兩銀子其實唐鬍子現在滑縣朱
召村我八月九月見過兩次並未出門我原是
哄朱躍瀝要他多送我盤費的意思至十一月

十五日我在宋躍澁家起身時他向親戚劉添祥借了誥軸與我做護身符我就改叫劉明德他又著這劉添祥送我到景州文歌村馮哲家中始行回去我十九日走到獻縣三角村賣藥治病於本月初四日被拏那唐鬍子有五十餘歲中等身量黃鬍子現在本籍開藥店生理又李文成外號叫鹽霜有兩句謠言若要紅花開

須要鹽霜來此外並無朱鹽霜其人也沒有朱
大桃這個名字是我隨口編造等語訊之劉添
祥馮哲供詞相符除再行研訊外理合奏

聞奏入

上命軍機大臣傳諭那彥成高杞楊遇春曰昨日直
隸省將馮克善解京當卽交刑部訊問伊師唐鬍
子下落據供唐鬍子卽唐恒樂係滑縣朱召村人

年五十餘歲身中黃鬍子素開藥店生理曾經教
伊鎗法此時現在朱召村該犯於八月九月見過
兩次並未出門並稱前在德州見宋躍瀼時因欲
宋躍瀼多幫盤費故捏稱前往山西解梁找尋伊
師傅約期起事其朱鹽霜卽朱大桃亦並無其人
皆伊隨口編造等語唐鬍子一犯旣在滑縣著那
彥成等卽派委妥員前赴朱召村嚴密擒捕就獲

後訊取確供飛速奏聞如已入滑城從賊並著於
克城後留心查緝務得真實下落那彥成於緝獲
該犯時並卽知照衡齡停緝高杞亦毋庸前往再
現據馮克善供出賊中大頭目八人除劉幗明王
修智朱克俊三犯均已殲斃外其劉宗順王道濫
壽光德陰成德馮相林五犯均未弋獲此外又據
供有小頭目六十四人惟徐安幗崔士俊王士香

胡成德王聚霍雲壁六人記得姓名其餘不能全
記等語崔士俊業已伏法徐安惻現與牛亮臣同
在滑城拒守此外各犯曾否緝獲殲捕並著於克
城之日留心查對將著名大頭目酌留二三人解
京訊辦其餘小頭目審明後均卽在被按律正法
又前據百齡奏拏獲賊目榮興太一犯據供徐安
惻保一大枝幹趙姓係宋朝後人今改稱何姓年

十一歲居滑縣西關是教中真主本年十月間曾被滑縣鄉民搶去徐安惻邀人救出現與徐安惻同住等語徐安惻捏稱趙姓爲宋朝後人惑衆謀逆此時趙姓是否與徐安惻同在滑城必須查拏辦理方足以息邪說而淨根株著那彥成等切實訪查嚴拏究辦不可疎漏

上又命軍機大臣傳諭百齡胡克家日前因豫省匪

徒滋事派兵剿捕恐有零匪分投奔竄當飭該督撫等設卡撥兵嚴加防範現在各處分竄賊匪俱已剿洗淨盡馮克善一犯已於直隸獻縣境內拏獲解京審辦渠魁俱以次殲擒滑縣孤城指日即可克復城克後嚴堵竄匪四逸最關緊要著百齡胡克家各派員弁四出偵探如滑城旣克餘匪就地殲除淨盡江安二省邊界可無須設防卽將各

處防兵次第裁撤以節糜費其江省審辦之周泳
太緒乾二案並著百齡催提犯證迅速審擬具奏
上又命軍機大臣傳諭衡齡曰本月初十日據章煦
派員將馮克善一犯解京嚴訊該犯據供伊師唐
鬍子卽唐恒樂係滑縣朱召村人現在本村開藥
舖生理並未在蒲州解梁其朱大桃一犯亦係該
犯捏造誑騙宋躍濫等語現已飭知那彥成等在

滑縣朱召村嚴緝唐恒樂訊供具奏衡齡前此派
往蒲解一帶躡緝唐鬍子各員弁曾否已有稟報
如該處並無蠢動衡齡仍飭令密行察訪暫緩帶
兵前往一面派員馳赴滑縣偵探如已將唐鬍子
拏獲指證的確晉省卽可停緝再滑城指日收復
該撫現駐晉省邊界查看滑城克復四竄零匪一
經剿淨所有晉省防堵官兵卽可以次裁撤以節

糜費

上又命軍機大臣傳諭額勒金布曰昨接章煦奏摺
獲逆首馮克善解京審辦馮克善係著名首逆迅
就擒縛豫省滑城餘賊亦指日悉可掃除至該處
各關隘訪有潛通勾結形跡可疑之人自當嚴加
盤詰但訊取初供所關最要不可任聽各營員先
存邀功之見概將謀逆重情引誘犯人令其供認

以輕報重及據所供查拏全無影響徒滋疑惑該副都統又不可因有此旨卽查緝疎懈轉致真實逆犯或有漏網也

上諭內閣曰滑城指日克復餘匪剿淨軍務卽可告歲此次直隸豫東三省被賊滋擾各州縣其城村鄉鎮多有紳士耆民團練義勇捐給錢米自衛里間而賊衆被剿奔竄之時因所至有備不致肆行

金史卷之九十二
三
裏脅於官軍亦不爲無助該士民等曉明大義志
切同仇實堪嘉尙著直隸山東河南各督撫查明
近賊各府州縣團練防護處所將倡首之紳士耆
民據實保奏分別賞給職銜其出貲出力之居民
商賈人等該督撫自行查辦或給予匾額或量加
賞賚以示褒獎

是日同興奏言查東省自軍興以來臣於藩運

兩庫兩次提銀四十萬兩解赴東昌隨時支發
均經奏蒙

聖鑒計自九月至今有就近由藩庫發給各州縣承
辦軍需者又有陸續撥解東昌局內支發者先
後又提用銀二十五萬五千餘兩統計共提過
運庫銀二十萬兩藩庫銀四十五萬五千餘兩
茲荷澤等處辦理賑濟卽於軍需項內先行動

撥應用東昌總局已無餘項臣現復飭提運庫
銀十萬兩解至東昌備用并據藩司稟解留撥
臨清關銀七萬兩來曹專備賑卹之需倘銀數
不敷容再

奏明動撥俟事竣將支銷款項分晰報銷奏入得
旨戶部知道

同日董誥等遵

旨查明押解馮克善之直隸委員兵役等開單具奏
得

旨此次押解逆犯馮克善進京之候補同知李簡遊
擊那蘇圖著各賞給小卷線縐一件兵役六名著
每名賞給一兩重銀鏢二個